



<i>Համարը</i> N 715-Ն	<i>Տեսակը</i> Հիմնական
<i>Տիպը</i> Որոշում	<i>Կարգավիճակը</i> Գործում է
<i>Սկզբնաղբյուրը</i> ՀՀՊՏ 2009.07.15/35(701) Հոդ.831	<i>Ընդունման վայրը</i> Երևան
<i>Ընդունող մարմինը</i> ՀՀ կառավարություն	<i>Ընդունման ամսաթիվը</i> 26.06.2009
<i>Ստորագրող մարմինը</i> ՀՀ վարչապետ	<i>Ստորագրման ամսաթիվը</i> 02.07.2009
<i>Վավերացնող մարմինը</i>	<i>Վավերացման ամսաթիվը</i>
<i>Ուժի մեջ մտնելու ամսաթիվը</i> 25.07.2009	<i>Ուժը կորցնելու ամսաթիվը</i>

ՀՀ ԿԱՌԱՎԱՐՈՒԹՅԱՆ ՈՐՈՇՈՒՄԸ ՕՐԳԱՆԱԿԱՆ ԳՅՈՒՂԱՏՆՏԵՍՈՒԹՅԱՆ ԱՆՑՈՒՄԱՅԻՆ ՇՐՋԱՆԻ ՏԵՎՈՂՈՒԹՅՈՒՆԸ, ԴՐԱ ԿՐՃԱՏՄԱՆ ԿԱՄ ԵՐԿԱՐԱԶԳՄԱՆ ԿԱՐԳԸ ՍԱՀՄԱՆԵԼՈՒ ՄԱՍԻՆ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԿԱՌԱՎԱՐՈՒԹՅՈՒՆ

Ո Ր Ո Շ ՈՒ Մ

26 հունիսի 2009 թվականի N 715-Ն

ՕՐԳԱՆԱԿԱՆ ԳՅՈՒՂԱՏՆՏԵՍՈՒԹՅԱՆ ԱՆՑՈՒՄԱՅԻՆ ՇՐՋԱՆԻ ՏԵՎՈՂՈՒԹՅՈՒՆԸ, ԴՐԱ ԿՐՃԱՏՄԱՆ ԿԱՄ ԵՐԿԱՐԱԶԳՄԱՆ ԿԱՐԳԸ ՍԱՀՄԱՆԵԼՈՒ ՄԱՍԻՆ

«Օրգանական գյուղատնտեսության մասին» Հայաստանի Հանրապետության օրենքի 5-րդ հոդվածի 1-ին մասի 9-րդ կետին համապատասխան՝ Հայաստանի Հանրապետության կառավարությունը **որոշում է**.

- Սահմանել օրգանական գյուղատնտեսության անցումային շրջանի տևողությունը, դրա կրճատման կամ երկարաձգման կարգը՝ համաձայն հավելվածի:
- Սույն որոշումն ուժի մեջ է մտնում պաշտոնական հրապարակման օրվան հաջորդող տասներորդ օրը:

Հայաստանի Հանրապետության  
վարչապետ

S. Սարգսյան

2009 թ. հուլիսի 2  
Երևան

Հավելված  
ՀՀ կառավարության 2009 թվականի  
հունիսի 26-ի N 715-Ն որոշման

ՕՐԳԱՆԱԿԱՆ ԳՅՈՒՂԱՏՆՏԵՍՈՒԹՅԱՆ ԱՆՑՈՒՄԱՅԻՆ ՇՐՋԱՆԻ ՏԵՎՈՂՈՒԹՅՈՒՆԸ, ԴՐԱ ԿՐՃԱՏՄԱՆ ԿԱՄ ԵՐԿԱՐԱԶԳՄԱՆ ԿԱՐԳԸ

I. ԸՆԴՀԱՆՈՒՐ ԴՐՈՒՅԹՆԵՐ

- Սույն կարգով սահմանվում է Հայաստանի Հանրապետությունում օրգանական գյուղատնտեսության անցումային շրջանի տևողությունը, դրա կրճատման կամ երկարաձգման կարգը:

II. ՕՐԳԱՆԱԿԱՆ ԳՅՈՒՂԱՏՆՏԵՍՈՒԹՅԱՆ ԱՆՑՈՒՄԱՅԻՆ ՇՐՋԱՆԻ ՏԵՎՈՂՈՒԹՅՈՒՆԸ

2. Օրգանական գյուղատնտեսության անցումային շրջանն սկսվում է օրգանական գյուղատնտեսությամբ զբաղվող տնտեսավարողի կողմից օրգանական գյուղատնտեսության միավորում Հայաստանի Հանրապետության օրենսդրության պահանջներին համապատասխան արտադրություն սկսելու վերաբերյալ սերտիֆիկացման մարմին հայտ ներկայացնելու պահից:

3. Անցումային շրջանի տևողությունն օրգանական բուսաբուծություն իրականացնող միավորում սահմանվում է՝

1) միամյա և երկամյա մշակաբույսերի համար՝ 24 ամիս, նախքան օրգանական մշակաբույսի ցանքը կամ տնկումը.

2) արտավայրերի համար՝ 24 ամիս, նախքան խոտի օրգանական արածեցման նպատակով օգտագործումը.

3) բազմամյա մշակաբույսերի և խոտհարքների համար (բացի արտավայրերից)՝ 36 ամիս, մինչև առաջին օրգանական բերքի հավաքը:

4. Սովորական (ավանդական) գյուղատնտեսական արտադրական միավորից օրգանական բուսաբուծություն իրականացնող միավոր գյուղատնտեսական կենդանիների և թռչունների ներմուծման դեպքում անցումային շրջանի տևողությունը սահմանվում է՝

1) խոշոր եղջերավոր անասունների և ձիերի համար՝

ա. լիահասակ կենդանիներ, աճեցված մսի արտադրության նպատակով՝ 12 ամիս կամ իրենց կյանքի տևողության առնվազն երեք քառորդը,

բ. հորթեր, աճեցված մսի արտադրության նպատակով՝ 6 ամիս, եթե ներմուծվել են մինչև 6 ամսական հասակը, անմիջապես կաթնային շրջանի ավարտից հետո,

գ. կաթ և կաթնամթերք արտադրելու նպատակով՝ 9 ամիս.

2) ոչխարի և այծի համար՝

ա. աճեցված մսի արտադրության նպատակով՝ 6 ամիս,

բ. կաթ և կաթնամթերք արտադրելու նպատակով՝ 9 ամիս.

3) խոզերի համար՝ աճեցված մսի արտադրության նպատակով՝ 6 ամիս.

4) թռչունների համար՝

ա. աճեցված մսի արտադրության նպատակով՝ ամբողջ կյանքի ընթացքում,

բ. ձվի արտադրության նպատակով՝ 6 շաբաթ.

5) մեղվաբուծության համար՝ 12 ամիս: Այդ ընթացքում ամբողջ մեղրամուրը պետք է փոխարինվի օրգանական մեղրամուրով.

6) ձկնաբուծության համար՝ կենդանի օրգանիզմի կյանքի տևողության չափով, կամ նվազագույնը 12 ամիս:

### III. ՕՐԳԱՆԱԿԱՆ ԳՅՈՒՂԱՏՆՏԵՍՈՒԹՅԱՆ ԱՆՑՈՒՄԱՅԻՆ ՇՐՋԱՆԻ ՏԵՎՈՂՈՒԹՅԱՆ ԿՐՃԱՏՄԱՆ ԿԱՄ ԵՐԿԱՐԱԶԳՄԱՆ ԿԱՐԳԸ

5. Օրգանական գյուղատնտեսության անցումային շրջանի տևողությունը կարող է երկարաձգվել կամ կրճատվել լիազոր մարմնի որոշմամբ՝ սերտիֆիկացման մարմնի առաջարկության հիման վրա:

6. Սերտիֆիկացման մարմինն օրգանական գյուղատնտեսության միավորի օրգանական գյուղատնտեսության անցումային շրջանի տևողության կրճատման կամ երկարաձգման վերաբերյալ առաջարկությունը՝ հիմնավորումներով, պատշաճ կարգով ներկայացնում է լիազոր մարմին:

7. Լիազոր մարմինը սերտիֆիկացման մարմնի առաջարկությունն ստանալուց հետո՝ 15-օրյա ժամկետում, ընդունում է որոշում օրգանական գյուղատնտեսության անցումային շրջանի տևողության կրճատման կամ երկարաձգման մասին:

8. Լիազոր մարմնի որոշումը եռօրյա ժամկետում պատշաճ ձևով տրամադրվում է սերտիֆիկացման մարմնին:

9. Լիազոր մարմնի՝ օրգանական գյուղատնտեսության անցումային շրջանի տևողության կրճատման կամ երկարաձգման մասին որոշումը 10-օրյա ժամկետում կարող է բողոքարկվել օրենքով սահմանված կարգով:

10. Օրգանական գյուղատնտեսության անցումային շրջանի տևողությունը կարող է կրճատվել 12 ամսով միայն օրգանական բուսաբուծություն իրականացնող միավորում՝ ելնելով հողատարածքի նախկինում օգտագործման վիճակից՝ հողը երկու կամ ավելի տարիներ մշակված չլինելու դեպքում:

11. Օրգանական գյուղատնտեսության անցումային շրջանի տևողությունը մեղվաբուծության համար կարող է երկարաձգվել 12 ամսով, եթե անցումային շրջանի 12 ամսվա ընթացքում մեղրամուրն ամբողջությամբ չի փոխարինվել օրգանական մեղրամուրով:

**Հայաստանի Հանրապետության  
կառավարության աշխատակազմի  
ղեկավար**

**Դ. Սարգսյան**